

## **Intervju za Nezavisnu novinsku agenciju ONASA, 18. 07.2013. godine**

### **1. Na sjednici Zajedničke komisije za odbranu i sigurnost održanoj prejkjučer (16. 07. 2013. godine), vodila se rasprava o Izvještaju o radu Ministarstva odbrane BiH za 2012. godinu. Kako su članovi Komisije ocijenili vaš Izvještaj i kako vi komentarišete rad Ministarstva odbrane u 2012. godini?**

Izvještaj o radu Ministarstva odbrane BiH za 2012. godinu usvojen je od strane Vijeća ministara BiH i upućen u Parlamentarnu proceduru i na ovoj sjednici ja sam obrazložio ovaj Izvještaj. Nama je veoma značajan stav Zajedničke komisije za odbranu i sigurnost, jer s jedne strane, ona nam ukazuje na propuste koji se dešavaju, a s druge strane, članovi Komisije, ulažući napor i stalnim podsticanjem, kontinuirano doprinose poboljšanju funkcionalnosti Ministarstva odbrane

Činjenica je da je izvještaj Državnog revizora za 2012. godinu bolji u odnosu na 2011. godinu, što potvrđuje konstataciju da je učinjen znatan napredak u otklanjanju uočenih nedostataka u radu iz 2011. godine. U procentima to je izraženo oko 50%, a veliki doprinos tome dali su i članovi Zajedničke komisije za odbranu i sigurnost svojim naporima.

Članovi Komisije su konstatovali većinom glasova prihvatili Izvještaj o radu, jer je veći broj nedostataka u radu u odnosu na 2011. godinu otkolonjen, uz napomenu da su ostali još neki nedostaci na kojima treba kontinuirano raditi.

Iz pozicije ministra odbrane, ja mogu da potvrdim da je u odnosu na 2011. godinu napredak evidentan, a da su Ministarstvo odbrane i Oružane snage BiH, i pored preostalih propusta, još uvijek najbolji dio reformskih procesa u Bosni i Hercegovini.

Ministarstvo odbrane BiH je jedino ministarstvo koje je, prije razmatranja na Domu narodu Parlamentarne skupštine BiH, podnijelo Izvještaj Zajedničkoj komisiji za odbranu i sigurnost, čime smo pokazali našu opredijeljenost za saradnju sa Zajedničkom komisijom. Sve obaveze koje su od strane Komisije postavljene pred nas, mi ćemo ispuniti, a u cilju uspostavljanja većeg nivoa efikasnosti u sistemu odbrane.

### **2. Možete li nam dati malo više informacija o Strateškom komitetu za naoružanje, municiju i minsko-eksplozivna sredstva?**

Strateški komitet je forum osnovan sa svrhom što efikasnijeg, bržeg i transparentnijeg rješavanja pitanja viškova naoružanja, municije i minsko-eksplozivnih sredstava koja su pod kontrolom Oružanih snaga Bosne i Hercegovine, a koja zbog stanja u kojem se nalaze i u uslovima u kojima se čuvaju mogu predstavljati prijetnju za građane Bosne i Hercegovine.

**- Kako je došlo do ideje da Ministar odbrane BiH bude predsjedatelj Komiteta i koji su interesi Ministarstva odbrane i države BiH za rukovođenje ovim Komitetom?**

Budući da pitanje viškova naoružanja i municije već duže vremena opterećuje našu instituciju, i da MO BiH zajedno sa našim prijateljima i partnerima iz međunarodne zajednice pokušava da ovo pitanje riješi na što efikasniji način, smatrali smo da je vrijeme da svi oni koji su do

sada bili uključeni u ovaj proces, a radili su po ovim pitanjima neovisni jedni od drugih, počnu raditi zajedno, ciljano i koordinirano pod jednom upravljačkom strukturom. Interesi MO BiH i države BiH su jednostavni, možemo kazati pragmatični, a to je da su ti viškovi naoružanja i municije prije svega teret našoj instituciji, a istovremeno potencijalna prijetnja.

#### **- Koji je sastav Strateškog komiteta?**

Strateškim komitetom predsjedava Ministar odbrane sa zamjenicima, a pored predstavnika MO i OS BiH, stalni članovi ovog Komiteta su Delegacija Europske unije u BiH, Misija OSCE-a u BiH, Ambasada Sjedinjenih Američkih Država u Bosni i Hercegovini, Ambasada Švicarske u BiH NATO štab u Sarajevu, EUFOR i UNDP.

#### **- Koji su osnovni ciljevi i zadaci Strateškog komiteta?**

Cilj Komiteta je pravovremeno odgovoriti na izazove povezane sa stanjem naoružanja, municije i minsko-eksplozivnih sredstava uskladištenim na lokacijama OS BiH. Pažnja u radu biće posvećena poboljšanju uslova skladištenja, redovnim i izvanrednim pregledima, tehničkoj ispravnosti sredstava, kao i korištenju, znavljanju, odlaganju i uništavanju istih. Komitet će aktivno uticati na održavanje i unapređenje postojećeg stepena sigurnosti u ovoj oblasti i pomagati putem logističkih, finansijskih i materijalno-tehničkih resursa članova ovog Komiteta i drugih zemalja.

Uz pomoć ostalih zemalja, Komitet će se, također, baviti i pitanjima perspektivnog naoružanja, municije i MiMES-a u smislu brige o uslovima skladištenja, poligona za uništavanje viškova naoružanja i municije.

#### **- Koliko dugo će djelovati Strateški komitet?**

Mandat Strateškog komiteta će trajati sve dok ne bude riješeno pitanje viškova naoružanja i municije u Bosni i Hercegovini. Proceduralno, mandat Komiteta će prestati na prijedlog predsjedavajućeg Strateškog komiteta, a to je Ministar odbrane.

### **3. U junu je započeo projekat „EXPLODE“ koji je također vezan za rješavanje pitanja viškova naoružanja i municije u Bosni i Hercegovini. Šta on predstavlja i koji je značaj ovog projekta za MO i OS BiH?**

„EXPLODE“ je projekat koji su pokrenuli Ministarstvo odbrane i Oružane snage Bosne i Hercegovine u saradnji sa Europskom unijom, Misijom OSCE-a u BiH (Organizacija za sigurnost i saradnju u Evropi) i UNDP-om (Razvojni program UN-a).

Projekat će trajati **28 mjeseci**, dakle do 2015. godine, a zvanično obilježavanje početka ovog projekta održano je 27.6.2013. godine u Doboju. Projekat finansira Europska unija u iznosu od **3.837.830 eura**. Napominjem da je Europska unija do sada osigurala više od 8 miliona eura za ove i slične namjene.

Cilj projekta „EXPLODE“ je podržati Oružane snage Bosne i Hercegovine u smanjenju viškova municije i minsko-eksplozivnih sredstava, kao i Ministarstvo odbrane Bosne i

Hercegovine u unapređenju upravljanja zalihama, sigurnosti i uslovima skladištenja na lokacijama uskladištenja.

Podsjećam da ukupna količina tona viškova naoružanja, municije i minsko-eksplozivnih sredstava iznosi preko 17.000. Veći dio te količine je visokorizičan, što predstavlja potencijalnu prijetnju za stanovništvo koje živi u blizini lokacija skladištenja te za vojnike koji osiguravaju ovakve viškove.

Projekat „EXPLODE“ sastoji se od tri komponente: uništavanje municije i minsko-eksplozivnih sredstava, razvoj kapaciteta za kontrolu naoružanja i upravljanje zalihama municije.

#### **4. Da li je MO BiH upoznato da je SIPA jučer izvršila pretres kuće Vaše državne službenice Naide Đulić? Ako jeste, kakav je stav Ministarstvo zauzelo u vezi sa istim?**

Imenovana osoba je zaposlena u Ministarstvu odbrane BiH, a njeno radno mjesto nije u direktnoj vezi sa prijemom profesionalnih vojnih lica u službu u Oružane snage BiH, ali postoje indicije da je djelovala suprotno važećim propisima, nanoseći time štetu ugledu MO BiH.

Nakon podnošenja prijave od strane pripadnika Oružanih snaga BiH krajem aprila 2013. godine da je imenovana pokušala iznuditi novac od njega na ime prijema u kategoriju podoficira, Generalni inspektorat MO BiH je proveo istragu i utvrdio da je podnesena prijava osnovana. S obzirom na ozbiljnost dokaza iz istrage, kompletan predmet je predat SIPA-i na nadležno postupanje.

Istraga će pokazati da li postoji eventualna odgovornost imenovane te će se Ministarstvo odbrane BiH ponašati u skladu sa rezultatima istrage.

U ovom momentu u cilju zaštite istražnih radnji, Ministarstvo odbrane ne može dati više informacija. Dalji postupak u vezi regulisanja radno-pravnog statusa imenovane vodit će se na osnovu dobijenih podataka od strane nadležnih tijela, zavisno od rezultata istrage.

Član 58. Zakona o državnoj službi u Bosni i Hercegovini predvidio je da ukoliko državni službenik bude predmet provođenja istrage za krivična djela, protiv državnog službenika i druge odgovorne dužnosti poduzima se **preventivna suspenzija** do okončanja postupka.